

Do thogh mé maicne Domhnuill  
[TCD 1340 (H.3.19), 34r]  
[Deibhidhe, Dán Díreach]

- 1 Do thogh mé maicne Domhnuill  
'gar chleachtus mo chedfhodhluim  
síad don ceadfrais do cleacht sinn  
teacht 'na n-égmais ní fhuilngim.
- 2 Maicne Domhnuill thiar is toir  
eidir Eirind ⁊ Alboin  
do boing don dá annsa inn  
co [leg. cá?] cloind tarrsa nach dtuig(h)im.
- 3 Cland Domnuill nar coigill crod  
os acu bhím do bhunodh  
tred is toghtha druim ar druim  
cred nach ortha do anfuind.
- 4 Ésguidh céim uam ar mh'aduigh  
do teacht d'fheghain F[h]eraduigh  
ceim da feghsain ge lúg linn  
ar cúl ní hesgaidh mh'inntind.
- 5 An eacdra thanac tar tuind  
co codhnach cloinde Domhnuill  
tren damh-sa teachta da thoigh  
nac annsa eachdra a nAlboin.
- 6 Teachd uatha ní hesgaid linn  
an trath thanac a nEirinn  
tuc caidreamh cloinne Colla  
moille ar mh'aigheadh eatorra.
- 7 Mo mhían an trat tarrla toir  
Mac Domnuill dreach mar corcoir  
tuc a nos a hAlbuin inn  
o tos gur ardaigh mh'inntinn.
- 8 Mo craidhi thiar ⁊ toir  
fa chloinn Colla go gcuart- (?)  
gur tseolus ar chloind Cholla  
do roind mh'eolus eatorra.
- 9 D'fis an tí da dtucus toil  
do baoi agum a nAlboin  
grad ealta do thríall co tuind  
do mhían na heachdra oruinn.
- 10 Tar gac encloinn fhegas mhe  
teacht uatha is adbar leisge  
do bud innleanta ar cloinn Cuinn  
ac boing imteachta oruinn.
- 11 Soighteach na righe as tír thoir  
ar ndealugad[h] re a dhutoigh  
doba creidhim eacht oile  
teacht d'Eirinn ar amhsoine.
- 12 Gan fuil iarmuir ina f[h]olt lag  
úa Colla ac cosg a námad

- rogha gach gobhlán da ghním  
orlár f[h]ola na n-ardrigh.
- 13 Colla Uais o a bfuil a[n] fear  
go Domnall úaidh da n-áirmher  
slat do geinilach clann gChuinn  
crann do dheighfhideac Domnaill.
- 14 A-ta agam da ceib chaim  
sloindfid me do Mac Domhnaill  
a-núasan fírbhun a fhrémh  
rigradh úasol na n-oilén.
- 15 A n-aireamh cia nac cuimhnig  
gach rí do Sil tSamhuirligh  
milis trat an uair-si d'f[h]ir  
a-ta re a n-uaisli dh'airimh.
- 16 Naenmur airdrig druim ar druim  
o Aenghus Mhac Domnuill<sup>s</sup>  
do fhreimh an Aonghuis oile  
d'aonfrais don reim rígraidi.
- 17 Clann Aonguis an airm druimnigh  
Eoin sud 7 Somairligh  
frém Gaoidheal tall do tháthaigh  
clann d'áoinfer is d'aonmháthair.
- 18 Sil Somhairligh do gab greim  
ar eachdra uainn a nEirind  
dream nar íslidh a dtreoir toir  
an sil-sin Eoin a nAlbain.
- 19 Sadhb inghin Amlaib ucht geal [34v]  
Mac Domhuill cí nach creidfeadh  
fuil tShaidhbhi taob re taoibh<sup>s</sup>  
go bfuil 'na aigri d'Amhláoibh.
- 20 Críc Mhanann fa chlannuib cnichd  
o Shaidb do fhúair a n-oighricht  
derbaid[h] cró Manann a-muigh  
gan tadall dó 'na dhuthuidh.
- 21 Domnall mhac Radhnuill rosg glas  
ar ndealughad re a dhuchas  
cred nar dluthaig[h] re clar Cuinn  
o narb ál dúthaig[h] Domhnaill.
- 22 Ríg sin nach éidir d'falac[h]  
is úad(a) ro fhás Feradhach  
crand d'fidbaid[h] an tíre tall  
d'iobraibh na righe Ragnall.
- 23 Mac Toirdealbaig táebh leabhar  
is urusa a aithnegad  
fuil Eochaid an úair ro ibh  
co bfuair eochair an einigh.
- 24 A-ta imat aithne dam  
a-der rit rádh na n-ughdar  
ní dearna[dh] h'adhuigh mar fhín  
gan treabhra[dh] d'faluibh airdrigh.

- 25 Fuil Áonghuis oig fa hard fuil  
fuil Domhnaill trít ar dtosuigh  
créd nach umhnachd fád chéib chaim  
gac lubgart do réim Raghnaill.
- 26 Gin co bedh fós fad cheib chais  
acht in t-áoinfer or fhasuis  
tonn rabharta don reim(h) righ  
céim farb adhanta th'ilgnimh.
- 27 Do fás o Murchad mhac Floinn  
inghin Hí Ruairc o Fremuinn  
deoch milis mar is dú dháoihb  
do ibhis do chrú Cathaoir.
- 28 D'imad airdrigh fad t'ucht geal  
ni cnesda cur re a n-áiream  
a dtomus uaim-si madh ail  
gan forus t'uaisli d'fhaghbháil.
- 29 Teid do chís ar clannuib cnichd  
co brath mad ail an oighrichd  
ní bfuil fath na hechtra ann  
cách ac teachta fad termann.
- 30 A n-am an catha do chur  
meirge sroill re crann curudh  
lintar an t-ath dh'atuib óir  
fad bratuigh trath an tinóil.
- 31 Mac Toirdhealbaig taeb mar tuinn  
gég cumra cloinne Domnaill  
lam derg o chach mur ro-cluin  
a ferg san áth do osguil.
- 32 Imda ar lár d'aitle a agha  
lethchos agus leathlamha  
stuagh[a] oca faghairt a bfuil  
úadha ac tabhairt an tachuir.
- 33 Mac Caitreach Fhina fuair geall  
ceann aidhe d'eigsib Eireann  
do ghab cloidheamh do gab gha  
do char troigeadh re tendta. d. t.
- 34 Ingin Uaiter na ngruadh ngeal  
uaisli a haicme da n-áirmer  
nír fás dibh acht cnú chiníl  
is dín do crú Chaitilín.
- 35 Clann Feorais fúair rea n-adhaigh  
is rigraid clann gConcubhair  
fuair-si na fola dob ferr  
uaisli a mogha da máoideam.
- 36 Mac De 'sa[n] crann derg re a druim  
Muire fós fechadh oruinn  
tic sa Lúan tre guin a gha  
ní bfuil acht ac túar teachta. Do...